

# **Rapport da gestiun 2025 dil president dalla pleiv catolica romana s. Martin, Trun**

Preziau sur Tomasz

Preziadas parochianas, preziai parochians

En miu rapport sco president dalla pleiv catolica romana S. Martin da nossa vischnaunca dundel a vus las informaziuns neccessarias sur dil passau en nies cumin-baselgia duront igl onn d'uffeci vargau.

## **General**

Ina pleiv sa mo funcziunar endretg aschiditg sco ella vegn pastorada activamein. Il problem da munconza da spirituals vegnin era nus plaunsiu a sentir pli fetg. Differentas pleivs han giu uonn sur pli liung temps negin agen plevon. Nossa pleiv ha il cletg dad haver in plevon engaschau, iniziativa e cun in bien maun per ses parochians. Persuenter essan nus fetg engrazieivels a nies augsegner Sur Dr. Tomasz Piotr Drwal.

## **Fiasta da Nossadunna**

Igl onn 2021 vein nus entschiet cul project da renovar la baselgia ed il plaz baselgia. Suentar varga 4 onns, ils 14 da settember 2025 vein nus saviu far la fiasta d'inauguraziun dalla baselgia da Nossadunna.

La sontga Messa ei vegnida celebrada, dil vicari general Peter Camanzind e nies plevon sur Tomasz Piotr Drwal. La festivitad ei vegnida embellida dal cor cecilan e dalla musica. Suentar messa ha la musica sunau avon baselgia, leu ha ei era dau in aperitiv. La fiasta ei vegnida embelida aunc cun ils plaids festivs da nies president Dumeni Tomaschett e da nies cusglier national Martin Candinas. Silsuentar veva Wendelin Decurtins ensemen cun commemoras dal cussegl pastoral organisau in bien gentar.

Igl ei stau ina bellezza fiasta e nus vein survegniu sil suenter bia resuns positivs. Aschi che nus vein decidiu ensemen cun Wendelin Decurtins ed il cussegl pastoral da far mintg'onn in gentar dalla fiasta da Nossadunna suenter messa.

Cheu lessel jeu aunc inaga engraziar a tut quels che han segidau finanziamein ni en in' altra moda vid quei project.

## **Catechetas / Catechet**

Isabelle Defuns e Rilana Cadruvi han abdicau lur plazzas sco catechetas sil davos digl onn da scola 2025/2026. Per la gronda lavur dad ellas per nos affons en tut quels onns lessel jeu engraziar ad ellas da tut cor.

Per igl onn proxim vegn Stefan Bolli era a dar ducrina allas classas primaras. Nus essen vidlunder dad encurir aunc ina persuna per dar ducrina allas classas primaras. Quei sa era esser ina persunna che sto aunc far la scolaziun da catecheta.

## **Stefan Bolli**

Sco vus veis segir udiu ei il catechet Stefan Bolli staus ellas medias perquei che la pleiv da Sedrun ha abdicau ad el. Daco ch' els han abdicau han ei bu vuliu tradir alla televisiun ed il radio.

Nus essan vegni informai che Stefan tegni buca adina en la distanza duida e ch'el contacteschi las scholaras e scholars sur las plattafuormas socialas. Nus, il Walter Deplazes, president dalla pleiv Sumvitg ed jeu (consorci da scola Trun Sumvitg) vein lu encuretge il discuors cun Stefan e cun ils scholars. Nus vein immediat informau ils responsabels dalla baselgia a Cuera ed ils meina scola dil consorci. Ils 10 da december vein nus discurre cun las classas dil scalem ault ed era detg ad els ch'ei dueigien discorrer quei culs geniturs. En quei discuors eis ei vegniu menziunau dad in per giuvnas ch'ellas vessien bugien che Stefan tenes pli bia distanza ed ellas lessen bu contact cun el sur las medias socialas. Quei vein nus detg a Stefan. Suentar 3 meins essen nus aunc inaga stai en scola per mirar la situaziun. Tut ils affons han menziunau che Stefan tegni ussa distanza ed ei seigi tut enuorden.

## Cussegl pastoral

Nus astgein mirar anavos sin bia bialas sentupadas da cuminonza. Persuenter engraziein nus a tuts commembers, gidontras e gidonters sco era alla suprastonza per lur engaschi e sustegn. El medem mument deplorein nus las visadas d'entgins commembers. Nus engraziein ad els per lur attaschadadad alla pleiv e giavischein tut bien. Nus selegrein da concepir communablamein activamein il proxim onn.

### a) Suprastonza

La collaboraziun denter la suprastonza ha funcziunau per mia cumpleina cuntentienscha. En las sedutas ei la suprastonza seradunada ed ha liquidau ils pensums adossai ad ella. Pensums delegai ad in ni l'auter per liquidaziun (art. 24 dalla constituziun) ha il responsabel sligiau e sch'igl ei stau neccessari ha la suprastonza sancziunau quella decisiun.

Olivia Pfister-Tgetgel ha demissiunau sco vice presidenta ed actuara sin la radunonza generala 2026. Ad Olivia lessel jeu engraziar da tut cor per sia lavur dils 9 davos onns.

Ils protocols eran adina screts exemplaricamein e sia moda da discussiunar senza emoziuns ed adina mo sur dals facts han adina impressiunau mei. Igl ei stau in grond plascher da luvrar ensemen cun ella. Per igl avegnir giavischel jeu mo il meglier ad ella. El cussegl pastoral stat ella vinavon commembra, bien engraziament per quei.

Cun plascher saiel informar vus, che Roger Alig semetta a disposiziun per il post sco vice president ed actuar. Jeu sun perschuadius che nus havein anflau in fetg bien candidat per quei post e selegrel sin la colaboraziun.

### b) La pastoraziun

Grazia agl engaschi da nies zun preziau plevon sur Tomasz Piotr Drwal, mo era cun igl agid da tut ils auters gremis dallas pleivs e caplanias ed en special la gronda lavur da Gabriela Vincenz sco secretaria, dil cussegl pastoral e dallas catechetas e dil catechet ha la pastoraziun era uonn funcziunau per cumpleina cuntentienscha.

### c) Instrucziun religiosa

*Cun Isabelle Defuns-Gamboni, Rilana Cadruvi Scherrer e Stefan Bolli havein nus giu tochen dacheu il cletg da haver duas catechetas ed in catachet fetg engaschai e che vegnan apreziat fermamein dils affons e dalla pleiv. Sco jeu hai gia menziunau ha Isabelle e Rilana abdicau sias plazzas sco catechetas per il davos digl onn da scola 2025/2026. Stefan Bolli surpren quellas classas.*

### d) Veta e mort

Mintgin ha siu agen pensum cheu sin tiara. Quel entscheiva cun la naschientscha e finescha cul viadi en la perpernadad. Veta e mort stattan datier ina a l'autra. Duront il davos onn havein nus stuiu prender cumiau da caras concristianas e da cars concristians. Nus havein denton era saviu selegrar ensemen cun ils geniturs da novs battegiat.

Davos la statistica stattan muments grevs mo era uras legrevlas.

|                         |    |
|-------------------------|----|
| Battens                 | 6  |
| Premcommunicants        | 8  |
| Extrada ord la baselgia | 7  |
| Mortoris                | 17 |

A tuttas defunctas e defuncts engraziel jeu per il bien che nus havein astgau retscheiver dad els duront lur veta terrestre. Allas famiglias en malencurada esprimin nus nossa pli sincera condolientscha.

## 1. Engaschis en la pleiv

Enteifer la communidad crisitiana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in cussegl pastoral activ, ugaus capluttas fideivels e cunscienzius ed ina massa autras persunas che fan el zuppau ina gronda lavur ch'ins vesa insumma buca. Menziunar lessel il cussegl pastoral, sco era la lavur dallas calustras e calusters, dils ugaus capluttas e dils organists. Medemamein lessel punctuar la lavur che vegn prestada da biars voluntariamein duront igl onn ora.

Allas persunas engaschadas lessel far in compliment per tut lur lavur per il beinstar da nossa baselgia: Lecturas, catechetas e catechets, l'organisaziun entuorn mintga sepultura, ils organists, ils chors, ils dirigents dil chors, l'uniun da mummas e dunnas, l'uniun da giuventegna cun ornar l'entrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

A Clau Scherrer e nossas catechetas Isabelle Defuns e Rilana Cadruvi Scherrer lessel jeu engraziar per lur grond engaschi. Els organiseschan adina puspei occasiuns nua ch'ils affons stattan el center dil survetsch divin. Sco gia menziunau eis ei donn ch'els calan cun quels engaschis. Era all'uniun da mummas e dunnas ergraziel per tut lur engaschi. Ellas organiseschan il solver per ils affons suenter las messas da scola, han quitaù dalla vestgadira dils premcommunicants ed il bi usit dils retgs sco era per il lavar ora tut ils sanctuaris. Senza igl engaschi dallas mummas e dunnas fuss quei tut buca pusseivel! Era allas scolastas ed ils scolasts lessel jeu engraziar per lur engaschi cun ils affons en connex cun igl usit dils retgs. Era a nossas ugauas e nos ugaus caplutta s'auda ei in special engraziament, preparan els mintgmai las capluttas per il survetsch divin ed han quitaù dalla facultad da mintga caplutta. Cunquei che nus havein per la caplutta Nossadunna dalla Neiv a Schlans negin ugau, procura dunna *Renata Pfister-Maissen* voluntariamein igl usitau quitaù dalla caplutta.

Buca emblidar d'engraziar lessel per las activitats entuorn las processions e sepulturas. A *Giusep ed Isabelle Defuns* per il riug da sepultura, allas giuvnas per il purtar la Nossadunna mintgamai da perdanonza sco era tut quels che portan ils cafanuns tier mintga fiasta. Alla Suprastonza communal deschi in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir cussegl pastoral in sincer engraziel fetg per lur bien sustegn da nies plevon.

## 2. Petgas da nossa cardientscha

### a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: emprema tochen quarta classa dalla catecheta *Isabelle Defuns-Gamboni*. Ella s'engascha era fetg cun ils affons per ils survetschs divins per famiglias. La 5. e 6. classa vegn instruida da *Rilana Cadruvi Scherrer* che prepara medemamein l'instrucziun dalla s. Creisma. Il scalem ault vegn instruius da *Stefan M. Bolli*. Per igl onn da scola 2026/2027 vegn *Stefan Bolli* a sorprendar tut las classas damai che Isabelle e Rilana han abdicau lur plazzas.

### b) Fatgs da Baselgia

Tuts ils fatgs da Baselgia vegnan menziunai el rapport dal president dil Cussegl pastoral.

### c) Manteniment dils beins

Per gl'usitau manteniment dils baghetgs sacrali sco era tier las casas pervendas vegn igl administratur *Mathias Cadruvi* a dar plaid e fatg. Era ad el lessel jeu engraziar grondamein per siu immens engaschi igl onn vargau.

#### 4. Persunal

a) secreteriat: A *Gabriela Vincenz* lessel engraziar spezialmein per sia lavur fidada e cunscenziusa.

b) *Lecturas e parter ora la s. communium*

Allas lecturas: *Annamaria Cavigelli-Tschuor, Gabi Cajacob-Mirer, Isabelle Defuns-Gamboni, Esther Tomaschett-Monn, Andrina Spescha-Cavigelli e Ryan Gay* per Trun, *Marta Bundi-Giger, Josefa Wolf-Tomaschett, Anita Orlik-Vincenz e Letizia Rensch-Tomaschett* per Zignau, *Erica Cavegn-Pfister* per Schlans, engraziel cordialmein per lur buns survetschs ch'ellas fan dumengia per dumengia.

c) *Organists*

*Jacinta Jacomet-Lombriser embellescha bunamein mintga dumengia il survetsch divin. Clau Scherrer embellescha las fiastas e speziallas concurrenzas. Engraziel fetg ad els dus persuerter.*

A *Claudio Vincenz* engraziein nus cordialmein per la prontadad d'embellir las s. messas cun musica sacrala en la baselgia da Zignau. Mo era als organists dil chor cecilian *Gieri Maissen e Flurin Monn* schein in sincer "Dieus paghi".

d) *CalustrAs*

Tarcisi Guldemann ha demissiunau sco caluster per Nossadunna dalla Glisch. El ei staus bia onns ugau pervenda da Nossadunna e naven digl onn 2008 ei el staus caluster per la baselgia da Nossadunna dalla Glisch. "DIEUS PAGHI" per sia lavur tut quels onns.

Da niev han *Wendelin Decurtins e Corina Petschen-Flepp* surpriu il post da caluster per la baselgia da Nossadunna dalla Glisch. Bien engraziament ad els dus per lur prontadad.

Era allas autras calustras ed als calusters lessel engraziar per lur engaschi zun fetg: a *Gabi e Georg Cajacob-Mirer* per la baselgia parochiala, a *Letizia Rensch-Tomaschett* per la baselgia da Zignau sco era ad *Erica Cavegn-Pfister* per la baselgia da Schlans. Senza lur gronda lavur el zuppau funcziunass nies sistem buca. Ei vegn prestau bia e buna lavur nunveseivla, mo pauc da lur lavur ei enconuschenta allas parochianas e parochians.

#### 5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticipais alla veta religiusa en nossa pleiv e caplania cun asister allas sontgas Messas ni d'autras purschidas. Persuerter lessel admetter il dui engraziament, sperond che nossa cuminonza resti activa era el temps da desinteress per la religiun, sco era per nossa Baselia catolica romana. Nies zun premurau plevon sur *Tomasz* vegn sustenius digl engaschau cussegl pastoral e dallas catechetas *Isabelle Defuns-Gamboni e Rilana Cadruvi Scherrer* che fan in bien fundament, sin il qual nus savein baghegiar nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura *Denise Tomaschett-Fryberg* ed al revisur *Gion Friberg*. Bien engraziament.

Enten il rapport hai menziunau plirs engraziaments. Jeu sperel ch'jeu hagi emblidau negin, sche quei fuss tuttina il cass, lessel seperstgisar tier quellas persunas ed engraziar en quei mument era a lezzas.

Sco finenziun lessel engraziar a vus, preziadas parochianas e parochians, che segideis adina puspei sin ina u l'autra moda morala ni finanziala per il beinstar da nossa pleiv ni documenteis entras vossa preschientscha dumengia per dumengia vies interess per ils fatgs da nossa religiun e nossa pleiv.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziav da tut cor.

Trun, avrel 2026

*Pieder Decurtins, president*